



Naalakkersuisut suliffissaaleqinerup ataavartumik akiorneqarnissaanik siunertaqartumik ataatsimoorussamik pilersaarummik piaartumik suliarinninnissamik peqquneqarnissaanik Inatsisartut aalajangiiffisassaattut siunnersuut. Pilersaarummi Sanaartugassanut Iluarsagassanullu Aningaasaateqarfimmi aningaasat uninngaannartut inuiaqatigiit akornanni sulisinneqalernissaanik, nunaqarfinni aalisakkerivinnik sullissinissamut isumaqatigiissutinut aningaasaliissutit amerlineqarnissaanik kiisalu illersorneqarsinnaasumik aalisagartassat amerlineqarnissaanik imaqassaaq. Pilersaarut Inatsisartut ataatsimiinneranni maanna ingerlasumi saqqummiunneqassaaq.

(Siumup Atassutillu Inatsisartunut ilaasortaatitai)

(Siullermeenera)

Nunatsinni annertuumik suliffissaaleqinerup piaartumik ataavartumillu annikillisinneqarnissaa siunertaralugu Naalakkersuisut ataatsimoortumik periusissamik Inatsisartunut saqqummiussaqaarnissaanik Inatsisartut aalajangiiffisassaattut siunnersuut.

(Inuit Ataqtigiit, Partii Inuit aamma Partii Naleraq Inatsisartunut ilaasortaatitai)

(Siullermeenera)

Aallarniutigalugu naqissusertigu, partiit tamarmik, Namminersorlutik Oqartussat, kommunit tamarmik, kattuffiit tamarmik taamatullu aamma innuttaasut tamarmik isumaqatigiissutigigatsigu sussaangilluinnaqqissaartoq suliffissaaleqinerup taama annertutiginera. Suliffissaaleqineq sualummik ataasiakkaanut sussaangilluinnarmat.

Taamaattumik kialluunniit qularutigissanngilaa tamarluinnatta eqqorsorisagut tunngavigalugit iliuseqarusukkatta suliffissaaleqinerujussuaq aningorniarlugu.



Naalakkersuisut qanittukkut aalajangerput 174,2 millioner koruunit atorlugit sanaartortitsiniarlutik iluarsaassititsiniarlutillu siunertaralugu inuit suliffissatigut periarfissarissaarnerulernissaat. Iliuuseq tamanna assut tapersersornarpoq.

Siunnersuutit Inatsisartut tamangajammik siunnersuutaat ullumi suliarisussaavagut. Siunnersuut siulleq Siumup Atassutillu siunnersuutigaat, siunnersuutillu aappaa Inuit Ataqtigiit, Partii Inuit Partii Naleqqallu siunnersuutigaat. Siunnersuutit qularnangilaq ajunngitsumik siunertaqarput aamma partiit socialistiskimik eqqarsariaasillit anguniagaannut tulluupput. Demokraatini socialistiskiunngilagut taamaattumik aamma suliffissaaleqinerup qanoq aningorniartariaqarnera allatut isumaqarfigaarput.

Siunnersuuteqartorpassuartut isumaqarpugut suliffissaaleqinerup akiornissaanut iliuusissanik pilersaarusiortoqartariaqartoq aamma isumaqarpugut, tamanna sukkasuumik pisariaqartoq taamaakkaluartorli assersuutigalugu akerleraarput akileraarutitik suli annertunerusumik agguaaqqinnissamut isuma. Isumaqarpugut, saqqummiunneqartunut naleqqiullugu suleqatigiisitaliarineqartussap iliuusissanut siunnersuusiornissaminut kiffaangissuseqarnerulluni sulisinnissaa Inatsisartuni partiit tamatta isumaqatigiissutigisariaqaripput.

Demokraatini kissaatigaarput ingerlatseqatigiiffiit akileraarutaasa appartinissaa taamatullu suliffiit nalikilliliinissaminut periarfissarissaarnerulernissaat ilaasariaqartut. Taakku pippata suliffeqarfiit aningaasaliinissaminut periarfissarissaarnerulissapput taamaasillutillu aamma amerlanerusunik atorfinitsitsinissaminut.

Tamatuma saniatigut kissaatigaarput innuttaasut suliffillit tamarmik sulinermut ilanngaammik tunineqassasut taamaasippat inuit sulinissaminut kajumissuseqarnerulissammata, pisortanit pilersorneqaannaratik.

Aammaarlunga oqaatigerusuppara siunnersuutit taakku suleqatigiisitaliarineqartussamut ilapittuutaannaammata.

Demokraatini taamaattumik neriuutigaarput, Inatsisartuni partiit sinniisuutitallit



Naalakkersuisullu sapiissuseqassasut siunnersuutitut marlunnut allannguutissatut siunnersuummut imaattumut ilaliinissaminnut.

Ataatsimiititaliamik suliffissaaleqinerup ataavartumik akiorneqarnissaanik siunertaqartumik ataatsimoorussamik pilersaarummik piaartumik suliaqartussamik pilersitseqqullugit Naalakkersuisut peqquneqarnissaannut Inatsisartut aalajangiifigisassaattut siunnersuut. Iliuusissanut pilersaarut saqqummiunneqassaaq Inatsisartut upernaakkut ataatsimiinneranni massakkut ingerlasumi.

Demokraatini inassutigaarput, Inuutissarisiornermut Ataatsimiititap allannguutissatut siunnersuut suliarissagaa aamma inassutigaarput siunnersuutaqqaartut siulliit marluk tamarmik itigartinneqassasut.